



**Nomeasaun no Mandatu
Komandante-Jeral no Segundu Komandante-Jeral
Polícia Nacional de Timor-Leste (PNTL)**

Mahein Nia Lian Nú. 138, 13 Marsu 2019



Foto: PNTL

Fundasaun Mahein (FM)

Website: www.fundasaunmahein.org

2019



Kontiudu sira

Kontiudu sira	2
Introdusaun	3
Metodolojia	3
Prosesu no kompetensia nomeasaun	4
Rekezitu nomeasaun	4
Promosaun no mandatu	6
Kandidatu feto	8
Rekomendasaun	9
Bibliografia	10

Introdusaun

Esperiensia hafoin liu tiha Krize 2006 Governu aprova Dekretu Lei N.º 16/2009 lora 18 Marsu Rejime Promosaun PNTL no difine mos iha dekreto ne'e iha n.º 1 artigu 48 kona-bá nomeasaun Komandante-Jeral iha periodu tranzitoriu no situasaun exesional. Iha ne'ebé bele nomea Timor-oan ida ne'ebé iha kapasidade, di'ak liu husi, Majistradu ka Jurista ne'ebé iha méritu ne'ebé rekoñesidu ba kargu Komandante-Jeral PNTL nian. Ikus mai Governu nomea Prokurador Jeral Repúblika Longuinhos Monteiro nu'udar Komandante-Jeral PNTL liu husi Rezolusaun Governu N.º 3/2009 lora 26 Marsu. Nomeasaun Longuinhos Monteiro ba Komandante-Jeral PNTL nian altura ne'eba hetan protesta husi parte oin-oin no sai polêmika boot iha PNTL nia laran. Katak nomea ema sivil Komanda PNTL no lolos nomeasaun no promosaun husi membru PNTL rasik.

Maske nune'e periodu tranzitoriu ramata ona iha lora 27 Marsu 2015 liu husi Repúblicação Decreto Lei N.º 10/2013 de 10 de Julhu Período Extraordinário Para o Comando da PNTL. Iha ne'ebé Komandante-Jeral nomea mai husi figura PNTL rasik. Altura ne'eba Governu liu husi Konsellu Ministru nomea liu husi Rezolusaun Governu N.º 13/2015, 26 de Março de 2015 nomea Superintendente Xefe Julio da Costa Hornay ba Komandante-Jeral ho promosaun ba postu Komisáriu no Superintendente Xefe Faustino da Costa ba Segundu Komandante-Jeral ho promosaun ba postu Komisáriu ho mandatu tinan haat no bele renova ho períodu ne'ebé hanesan.

Nune'e iha lora 27 Marsu 2019 Polícia Nacional Timor-Leste (PNTL) sei celebra nia aniversariu ba dala-19 (sanolu resin-sia). Iha tempu hanesan mandatu Komandante-Jeral PNTL Komisáriu Julio da Costa Hornay no Segundu Komandante-Jeral PNTL Komisáriu Faustino da Costa ramata mos. Signifika katak nomeasaun foun ka renovasaun ba kargu Komandante-Jeral no Segundu Komandante-Jeral sei akontese tuir kompetensia Konsellu Ministru nian.

Iha âmbito ida ne'e relatóriu ne'e halo análise kona-bá prosesu no kompetensia sira nomeasaun, rekezitu sira nomeasaun, promosaun no mandatu, no asuntu fetu ligadu ho nomeasaun ba Komandante-Jeral no Segundu Komandante-Jeral tuir Dekretu Lei N.º 16/2009 lora 18 Marsu Rejime Promosaun PNTL nia dispozisaun no Lei sira.

Metodolojia

Métodu ne'ebé adopta iha peskiza ida ne'e nian maka liu husi revizaun inisial ida ho dokumentu no lejislasaun espesifiku sira kona-bá nomeasaun no promosaun iha âmbito nomeasaun ba Komandante-Jeral no Segundu Komandante-Jeral PNTL. Hafoin prosesu ne'e ramata, ikus liu hodi konklui relatóriu ne'e liu husi métodu ne'ebé Fundasaun Mahein (FM) adopta maka *Security Sector Discussion (SSD)*. SSD hanesan métodu diskusaun ne'ebé involve peskizador sira FM nian hodi halo análise, hakerek relatóriu no hato'o rekomendasaun sira husi rezultadu peskiza nian.

Prosesu no kompetensia nomeasaun

Prosesu nomeasaun ba kargu sira Komandante-Jeral no Segundu Komandante-Jeral PNTL tuir Dekretu Lei N.º 9/2009, loron 18 Feveireiru Lei Organika PNTL nian no Dekretu Lei N.º 16/2009 loron 18 Marsu Rejime Promosaun PNTL nian estabese hanesan tuir mai ne'e.

Komandante-Jeral PNTL maka Komisáriu ida ne'ebé hetan nomeasaun liu husi rezolusaun Konsellu Ministru, tuir proposta husi Ministru ne'ebé responsavel ba Seguransa hafoin simu pareser husi Konsellu Superior Polísia nian. Nune'e mos Segundu Komandante-Jeral PNTL maka Komisáriu ida ne'ebé hetan nomeasaun liu husi rezolusaun Konsellu Ministru, tuir proposta husi Ministru ne'ebé responsavel ba Seguransa hafoin simu pareser husi Konsellu Superior Polísia nian¹.

Konsellu Superior Polísia (PNTL) iha reponsabilidade fó pareser kona-bá nomeasaun ba Komandante-Jeral no Segundu Komandante-Jeral PNTL. Konsellu Superior Polísia prejide husi Komandante-Jeral PNTL no hanesan orgaun konsulta Komandante-Jeral nian, maibe la atribui kompetensia ba orgaun ne'e hodi foti desizaun².

Konsellu Ministru iha kompetensia atu nomea ka exonera Komandante-Jeral no Segundu Komandante-Jeral PNTL nian tuir proposta Ministru ne'ebé responsavel ba pasta Seguransa nian no tuir Lei ne'ebé iha.³

Signifika katak Konsellu Superior Polísia iha deit reponsabilidade fó pareser kona-bá nomeasaun ba Komandante-Jeral no Segundu Komandante-Jeral PNTL. Ministru responsavel ba pasta Seguransa halo proposta nomeasaun ka exonerasaun ba Komandante-Jeral no Segundu Komandante-Jeral PNTL ba Konsellu Ministru. Ikus liu, Konsellu Ministru maka iha kompetensia atu nomea ka exonera Komandante-Jeral no Segundu Komandante-Jeral PNTL nian liu husi Rezolusaun Governu nian.

Rekezitu nomeasaun

Rekezitu sira ne'ebé estabese iha n.º 1 artigu 23 no n.º 1 artigu 24 Dekretu Lei N.º 16/2009 loron 18 Marsu Rejime Promosaun PNTL kona-bá nomeasaun ba Komandante-Jeral no Segundu Komandante-Jeral PNTL nian.

1. Komandante-Jeral PNTL

Komandante-Jeral PNTL nian Komisáriu ida ne'ebé hetan nomeasaun liu husi rezolusaun Konsellu Ministru, tuir proposta husi Ministru ne'ebé responsavel ba Seguransa hafoin simu pareser husi Konsellu Superior Polísia nian⁴. N.º 1 artigu 23 kona-bá nomeasaun ba Komandante-Jeral PNTL hatete:

¹ Artigu 10 no 11 Dekretu Lei N.º 9/2009, loron 18 Feveireiru Lei Organika PNTL

² n.º 1, 2 no alinea a) n.º 5 artigu 13 Dekretu Lei N.º 9/2009, loron 18 Feveireiru Lei Organika PNTL

³ n.º 1 artigu 32 Dekretu Lei N.º 16/2009, loron 18 Marsu Rejime Promosaun PNTL

⁴ n.º 1 artigu 10 Dekretu Lei N.º 9/2009, loron 18 Feveireiru Lei Organika PNTL

“O Comandante-Geral da PNTL é nomeado, após avaliação curricular, de entre os oficiais superiores com o posto de Comissário ou Superintendente Chefe, com o mínimo de dois anos de permanência no posto e exemplar comportamento disciplinar”.

Husi dispozisaun n.º 1 artigu 23 nian hatuur rekezitu sira ne'ebé tenke prenxe husi kandidatu sira ne'ebé sei nomea ba Komandante-Jeral PNTL nian. Iha âmbito nomeasaun ba Komandante-Jeral PNTL nian tenke liu husi:

- a) Avaliasaun kurikulu katak haree ba kandidatu nia nivel edukasaun, formasaun no kursu sira ne'ebé kandidatu ne'e hetan ona. Liu-liu formasaun no kursu espesialidade iha area relevante sira.
- b) Tenke Oficial Superior ho postu Komisáriu ka Superintendente Xefe
- c) Minimu tinan 2 (rua) hela iha postu ne'e katak kandidatu ne'ebé nomea ba Komandante-Jeral PNTL minimu tenke hela iha postu Komisáriu ka Superintendente Xefe tinan rua.
- d) Komportamentu dixiplinar ne'ebé exemplar katak la involve iha kazu dixiplinar no kriminal ruma, no liu-liu komportamentu nu'udar exemplu iha PNTL nia laran.

2. *Segundu Komandante-Jeral PNTL*

Segundu Komandante-Jeral PNTL maka Komisáriu ne'ebé hetan nomeasaun liu husi rezolusaun Konsellu Ministru, tuir proposta husi Ministru ne'ebé responsavel ba seguransa hafoin simu pareser husi Konsellu Superior Polísia nian⁵. N.º 1 artigu 24 kona-bá nomeasaun ba Segundu Komandante-Jeral PNTL hatete:

“O 2º Comandante-Geral da PNTL é nomeado, após avaliação curricular, de entre os oficiais superiores com o posto de Superintendente Chefe, com o mínimo de dois anos de permanência no posto e exemplar comportamento disciplinar”.

Nune'e mos nomeasaun ba Segundu Komandante-Jeral PNTL nian tenke liu husi:

- a) Avaliasaun kurikulu katak haree ba kandidatu nia nivel edukasaun, formasaun no kursu sira ne'ebé kandidatu ne'e hetan ona. Liu-liu formasaun no kursu espesialidade iha area relevante sira
- b) Tenke Oficiais Superior ho postu Superintendente Xefe
- c) Minimu tinan 2 (rua) hela iha postu ne'e katak kandidatu ne'ebé nomea ba Segundu Komandante-Jeral PNTL minimu tenke hela iha postu Superintendente Xefe tinan rua
- d) Komportamentu dixiplinar ne'ebé exemplar katak la involve iha kazu disiplinlar no kriminal ruma, no liu-liu komportamentu nu'udar exemplu iha PNTL nia laran

⁵ n.º 1 artigu 11 Dekretu Lei N.º 9/2009, loron 18 Feveireiru Lei Organika PNTL

Tabela 01: Kategoria no postu sira

Kategoria sira	Postu sira (tuir orden dekresente – boot to'o ki'ik)
Ofisiál Superior	Komisáriu Superintendente Xefe Superintendente Superintendente Asistente
Ofisiál Inspetór	Inspetór Xefe Inspetór Inspetór Asistente
Sarjentu	Sarjentu-Xefe Primeiru-Sarjentu Sarjentu
Ajente	Ajente Xefe Ajente Prinsipál Ajente

Fonte: Aneksu I - Dekretu Lei N.º 16/2009 loron 18 Marsu Rejime Promosaun PNTL

Promosaun no mandatu

Iha kazu nomeasaun Komandante-Jeral no Segundu Komandante-Jeral PNTL husi Ofisiais Superior sira PNTL nian ho postu Superintendente Xefe promove automatikamente ba Komisáriu⁶. Maibe tenke permanense ka hela iha postu ne'e minimu tinan rua⁷. Nune'e mandatu ba Komandante-Jeral no Segundu Komandante-Jeral PNTL nia mandatu tinan 4 (haat) no bele renova ba periodu ne'ebé hanesan, liu husi rezolusaun Konsellu Ministru nian hafoin simu pareser husi Konsellu Superior Polisia nian no proposta Ministru ne'ebé responsavel ba pasta seguransa⁸.

Tabela 02: Figura potensial sira Ofisiais Superior PNTL

Nú.	Naran	Postu	Kargu Atual
1.	Afonso de Jesus	Komisáriu	Adidu Seguransa ba Australia
2.	Julio da Costa Hornay	Komisáriu	Komandante-Jeral
3.	Faustino da Costa	Komisáriu	Segundu Komandante-Jeral
4.	Mateus Fernandes	Superintendente Xefe	Komandante Administrasaun
5.	Pedro Belo	Superintendente Xefe	Komandante Distritu Dili
6.	Armando Monteiro	Superintendente Xefe	Komandante Distritu Bobonaro
7.	Carlos A. S. Jeronimo	Superintendente Xefe	Xefe Gabinete Inspesaun Jeral PNTL
8.	José Maria Neto Mok	Superintendente Xefe	Xefe Servisu Informasaun Polisia (SIP)
9.	Octavio de Araújo	Superintendente Xefe	-
10.	Afonso dos Santos	Superintendente Xefe	Komandante Unidade Especial Polisia (UEP)
11.	Henrique da Costa	Superintendente Xefe	-
12.	José Soares	Superintendente Xefe	Komandante Distritu Baucau
13.	Hermenegildo da Cruz	Superintendente Xefe	-

Fonte: PNTL, 2019

⁶ n.º 3 artigu 23 no n.º 3 artigu 24 Dekretu Lei N.º 16/2009, loron 18 Marsu Rejime Promosaun PNTL

⁷ n.º 1 artigu 23 no n.º 1 artigu 24 Dekretu Lei N.º 16/2009, loron 18 Marsu Rejime Promosaun PNTL

⁸ n.º 2 artigu 23 no n.º 2 artigu 24 Dekretu Lei N.º 16/2009, loron 18 Marsu Rejime Promosaun PNTL

Iha sirkuntasia ida ne'e iha possibilidade haat maka sei akontese iha âmbito nomeasaun ba kargu Komandante-Jeral no Segundu Komandante-Jeral PNTL nian. *Primeiru*, atual Komandante-Jeral PNTL Komisáriu Julio da Costa Hornay no Segundu Komandante-Jeral Komisáriu Faustino da Costa bele nomea fila-fali ba kargu ne'e ho periodu ne'ebé hanesan.⁹ Bainhira iha intensaun atu renova ka nomea fila-fali ba Komandante-Jeral no Segundu Komandante-Jeral PNTL simu ona karta eskrita minimu iha loron 60 (neen-nolu) nia laran molok mandatu ne'e atu ramata. Maibe bainhira autoridade kompetente¹⁰ la fó hatene intensaun atu renova mandatu Komandante-Jeral no Segundu Komandante-Jeral PNTL ramata automatikamente¹¹.

Segundu, kandidatu foun husi Oficiais Superior sira PNTL nian ho postu Superintendente Xefe ne'ebé tinan rua ona permanensia iha postu ne'e. Nune'e nomeasaun foun ba Komandante-Jeral no Segundu Komandante-Jeral liu husi porposta Ministru ne'ebé responsavel ba pasta Seguransa no Konsellu Ministru nomea liu husi rezolusaun Governu nian hafoin simu pareser husi Konsellu Superior Polísia nian. Tamba Komandante-Jeral no Segundu Komandante-Jeral nomea husi Oficiais Superior postu Superintendente Xefe promove automatikamente ba postu Komisáriu¹². Ho ida ne'e Komandante-Jeral no Segundu Komandante-Jeral foun nia mandatu tinan 4 (haat) no bele renova ho periodu ne'ebé hanesan.

Terseiru, entre Oficiais Superior sira ho postu Komisáriu na'in tolu ne'ebé daudaun ne'e sei ativu iha PNTL nomea ba Komandante-Jeral no Segundu Komandante-Jeral. Oficiais Superior sira ho postu Komisáriu maka hanesan Komisáriu Afonso de Jesus (atual Adidu Seguransa ba Australia), Komisáriu Julio da Costa Hornay (atual Komandante-Jeral PNTL) no Komisáriu Faustino da Costa (atual Segundu Komandante-Jeral PNTL). Iha ne'ebé prosesu nomeasaun hala'o tuir n.º 1 artigu 10 no n.º 1 artigu 11 Dekretu Lei N.º 9/2009, loron 18 Feveiru Lei Organika PNTL no n.º 1 artigu 23, n.º 1 artigu 24 no n.º 1 artigu 32 Dekretu Lei N.º 16/2009, loron 18 Marsu Rejime Promosaun PNTL nia dispozisaun.

Kuartu, possibilidade seluk kandidatu husi Oficiais Superior ho postu Superintendente Xefe hamutuk ho postu Komisáriu ida. Iha ne'ebé nafatin hala'o tuir dispozisaun n.º 1 artigu 10 no n.º 1 artigu 11 Dekretu Lei N.º 9/2009, loron 18 Feveiru Lei Organika PNTL no n.º 1 artigu 23, n.º 1 artigu 24 no n.º 1 artigu 32 Dekretu Lei N.º 16/2009, loron 18 Marsu Rejime Promosaun PNTL nian.

⁹ Renovasaun ba kargu Komandante-Jeral no Segundu Komandante-Jeral hala'o nafatin tuir n.º 2 artigu 23 no n.º 2 artigu 24 Dekretu Lei N.º 16/2009, loron 18 Marsu Rejime Promosaun PNTL nia dispozisaun.

¹⁰ Autoridade competente maka Konsellu Ministru (n.º 1 artigu 32 Dekretu Lei N.º 16/2009, loron 18 Marsu Rejime Promosaun PNTL nia dispozisaun)

¹¹ n.º 4 artigu 23 no n.º 4 artigu 24 Dekretu Lei N.º 16/2009, loron 18 Marsu Rejime Promosaun PNTL

¹² n.º 3 artigu 23 no n.º 3 artigu 24 Dekretu Lei N.º 16/2009, loron 18 Marsu Rejime Promosaun PNTL

Kandidatu Feto

Opiniaun no sujestaun husi públiku kona-bá kandidatu Komandante-Jeral no Segundu Komandante-Jeral sujere mos kandidatu husi feto PNTL ba pozisaun refere. Iha ne'ebé fihir ba figura feto sira ne'ebé daudaun ne'e iha kategoria Ofisiais Superior. Nune'e mos figura feto sira ne'ebé iha esperiensa no komanda iha pozisaun sira aas PNTL nian. Nune'e tabela tuir mai ne'e deskreve kona-bá figura feto sira ne'ebé iha kategoria Ofisiais Superior, esperiensa no komanda iha pozisaun sira ass PNTL nian.

Tabela 03: Ofisiais Superior Feto PNTL

Nú.	Naran	Postu	Kargu Atual
1.	Natercia Martins	Superintendente	Komandante Distritu Ermera
2.	Julia Gama	Superintendente	-
3.	Umbelina Soares	Superintendente Asistente	2º Komandante Distritu Aileu

Fonte: PNTL, 2019

Relasiona ho kandidatu feto ba kargu Komandante-Jeral no Segundu Komandante-Jeral PNTL nian. Iha media nasional Ministru Interior Interinu (atual Ministru Defeza) Filomeno Paixão de Jesus responde katak kandidatu ne'ebé Konsellu Superior Polísia apresenta la iha kandidatu feto tamba la prenxe rekezitu sira ne'ebé estabesele iha Lei¹³.

FM nia observaun haree katak la prenxe rekezitu sira iha Lei la signifika katak feto labele kandidata ka nomea ba Komandante-Jeral no Segundu Komandante-Jeral. Iha ne'ebé Dekretu Lei N.º 9/2009, loron 18 Feveiru Lei Organika PNTL no Dekretu Lei N.º 16/2009, loron 18 Marsu Rejime Promosaun PNTL la limite feto nomea ba kargu Komandante-Jeral no Segundu Komandante-Jeral. Maibe ema ne'ebé sai hanesan kandidatu no nomea ba pozisaun rua ne'e tenke hala'o tuir Dekretu Lei N.º 16/2009, loron 18 Marsu Rejime Promosaun PNTL nia dispozisaun.

Rekezitu ne'ebé estabesele iha Dekretu Lei N.º 16/2009, loron 18 Marsu Rejime Promosaun PNTL hatete kandidatu no ema ne'ebé nomea ba Komandante-Jeral no Segundu Komandante-Jeral tenke Ofisiais Superior ho postu Superintendente Xefe no minimu tinan rua permanensia iha postu ne'e¹⁴.

n.º 1 artigu 23:

“O Comandante-Geral da PNTL é nomeado, após avaliação curricular, de entre os oficiais superiores com o posto de Comissário ou Superintendente Chefe, com o mínimo de dois anos de permanência no posto e exemplar comportamento disciplinar”.

n.º 1 artigu 24:

“O 2º Comandante-Geral da PNTL é nomeado, após avaliação curricular, de

¹³ GMN TV, loron 12 Marsu 2019

¹⁴ n.º 1 artigu 23 no n.º 1 artigu 24 Dekretu Lei N.º 16/2009, loron 18 Marsu Rejime Promosaun PNTL



entre os oficiais superiores com o posto de Superintendente Chefe, com o mínimo de dois anos de permanência no posto e exemplar comportamento disciplinar”.

Ho ida ne'e haree ba figura feto sira ne'ebé identifika iha Tabela 03 hotu-hotu ho deit postu Superintendente. Signifika katak la prenxe rekezitu ne'ebé estabese iha n.º 1 artigu 23 no n.º 1 artigu 24 Dekretu Lei N.º 16/2009, lora 18 Marsu Rejime Promosaun PNTL nia dispozisaun.

Bainhira iha nesesidade ruma ejije promove Oficiais Superior feto husi postu Superintendente no Superintendente Asistente ba postu Superintendente Xefe iha tempu badak nia lara. Ida ne'e mos nafatin la prenxe rekezitu. Tamba Oficiais Superior ne'ebé ho postu Superintendente Xefe, minimu tinan rua permanensia iha postu ne'e maka bele nomea ba Komandante-Jeral no Segundu Komandante-Jeral. *Exepto* halo alterasaun ba n.º 1 artigu 23 no n.º 1 artigu 24 Dekretu Lei N.º 16/2009, lora 18 Marsu Rejime Promosaun PNTL.

Rekomendasaun

1. Rekomenda ba Ministru ne'ebé responsavel ba pasta Seguransa (Ministru Interior Interinu) no Konsellu Ministru halo avaliasaun ida rigorozu tuir rekezitu sira ne'ebé estabese iha n.º 1 artigu 23 no n.º 1 artigu 24 Dekretu Lei N.º 16/2009, lora 18 Marsu Rejime Promosaun PNTL antes halo nomeasaun.
2. Rekomenda ba Ministru ne'ebé responsavel ba pasta Seguransa (Ministru Interior Interinu) no Konsellu Ministru iha prosesu avaliasaun ne'e husu Konsellu Superior Polísia (PNTL) fó pareser ida ne'ebé nia dadus mai husi Departamentu Rekursu Umanu no Departamentu Justisa PNTL nian.
3. Rekomenda involve mos entidade relevante sira hanesan Tribunal, Ministériu Públiku, Komisaun Anti Korrupsaun (KAK), Provedoria Direitus Humanus no Justisa (PDHJ) iha prosesu avaliasaun ne'e ligadu ho aktu krime no dixiplinar nian.



Bibliografia

Decreto de Lei N.º. 16/2009 de 18 de Março. Regime de Promoção da Polícia Nacional de Timor-Leste

Decreto de Lei N.º. 9/2009 de 18 de Fevereiro. Lei Organica Polícia Nacional de Timor-Leste (PNTL)

Republicação Decreto Lei N.º 10/2013 de 10 de Jullu Período Extraordinário Para o Comando da PNTL

Resolução do Governo N.º 13/2015, 26 de Março de 2015

Resolução do Governo N.º 3/2009 de 26 de Março